

魏

書

六

孝莊紀第十

魏書

孝莊皇帝諱子攸彭城王勰之第三子母曰李
妃肅宗初以勰有魯陽翼衛之勲封武城縣開
國公幼侍肅宗書於禁內及長風神秀慧姿貌
甚美拜中書侍郎城門校尉兼給事黃門侍郎
雅為肅宗所親待長直禁中遷散騎常侍御史
中尉孝昌二年八月進封長樂王轉侍中中軍
將軍三年十月以兄彭城王劭事轉為衛將軍
左光祿大夫中書監實見出也及武泰元年春

二月肅宗崩大都督尔朱榮將向京師謀欲廢立以帝家有忠勲且兼民望陰與帝通榮乃率衆來赴夏四月丙申帝與兄弟夜北渡河丁酉會榮於河陽戊戌南濟河即帝位以兄彭城王劭爲無上王弟霸城公子正爲始平王以榮爲使持節侍中都督中外諸軍事大將軍尚書令領軍將軍領左右封太原王己亥百寮相率有司奉璽紼備法駕奉迎於河梁庚子車駕巡河西至陶渚榮以兵權在己遂有異志乃害靈太

后及幼主次害無上王劭始平王子正又害丞相高陽王雍司空公元欽儀同三司元怛芝儀同三司東平王略廣平王悌常山王邵北平王超任城王彛趙郡王敏中山王叔仁齊郡王溫公卿已下二千餘人列騎衛帝遷於使幕旣而榮悔稽顙謝罪語在榮傳辛丑車駕入宮御太極殿詔曰太祖誕命應期龍飛燕代累世重光載隆帝緒冀欲闡茲洪業永在無窮豈圖多難遭茲百六致使妖悖四起內外競侵朝無恤政

之臣野多怨酷之士是由女主專朝致茲顛覆
孝明皇帝大情沖順深存隱忍奮棄萬國衆用
疑焉苟求胡出入守神器凡厥有心莫不解體
太原王榮世抱忠孝功格古今赴義晉陽大會
河洛乃推翼朕躬應茲大命德謝少康道愧前
緒猥以眇身君臨萬國如涉淵海罔知所濟可
大赦天下改武泰爲建義元年從太原王督將
軍士普加五階在京文官兩階武官三級復天
下租役三年壬寅太原王尒朱榮上表請追諡

無上王爲皇帝餘死於河陰者諸王刺史贈三
司三品者令僕五品者刺史七品以下及民郡
鎮諸死者子孫聽立後授封爵詔從之癸卯以
前太尉公江陽王繼爲太師司州牧驃騎大將
軍開府儀同三司相州刺史北海王顥爲太傅
開府仍刺史平東將軍光祿大夫清淵縣開國
侯李延寔爲太保進封陽平王尋轉太傅安南
將軍并州刺史元天穆爲太尉公封上黨王侍
中車騎大將軍儀同三司楊椿爲司徒公車騎

大將軍儀同三司頓丘郡開國公穆紹爲司空
公領尚書令進爵爲王使侍節車騎大將軍雍
州刺史上黨公長孫稚爲驃騎大將軍開府儀
同三司進爵爲王尋改封馮翊王中軍將軍殿
中尚書元謚爲儀同三司尚書左僕射封魏郡
王中軍將軍給事黃門侍郎元瑱爲東海王金
紫光祿大夫廣陵王恭爲儀同三司甲辰追復
故廣陽王淵故樂安王鑒爵通直散騎常侍敷
城王坦爲咸陽王諫議大夫元貴平爲東萊王

直閣將軍元肅爲魯郡王秘書郎中元曄爲長
廣王馮翊郡開國公源紹景復先爵隴西王扶
風郡開國公馮固東郡公陸子彰北平公長孫
悅並復其先王爵以北平王超還復爲安定王
丁未詔內外解嚴庚戌封大將軍介朱榮次子
義羅爲梁郡王詔蠕蠕主阿那瓌贊拜不名上
書不稱臣是月汝南王悅北海王顥臨淮王彧
前後奔蕭衍郢州刺史元願達據城南叛五月
丁巳朔加大將軍介朱榮北道大行臺以尚書

右僕射元羅爲東道大使征東將軍光祿勳元
欣副之巡方黜陟先行後聞辛酉大將軍尔朱
榮還晉陽帝餞於邙陰丙寅詔曰自孝昌之季
法令昏泯懷忠守素擁隔莫申深然宿憾控告
靡所其有事在通途橫被疑異名例無爽枉見
排抑或選舉不平或賦役煩苛諸如此者不可
具說其有訴人經公車注不合者悉集華林東
門朕當親理寃獄以申積滯已巳齊州郡民賈
皓聚衆反夜襲州城會明退走乙亥晉州刺史

樊子鵠克唐州斬刺史崔元珍行臺鄺暉傳首
京師壬午詔求德行文藝政事強直者縣令太
守刺史皆敘其志業具以表聞得三人以上縣
令太守刺史賞一階舉非其人亦黜一階又以
舊敘軍勲不過征虜自今以後宜依前式以上
餘階積而爲品其從輿駕北來之徒不在此例
悉不聽破品受階破階請帛先是蕭衍遣其將
曹義宗寇荊州癸未以中軍將軍吏部尚書費
穆爲使持節都督南征諸軍事節度荊州刺史

王熙以討之六月丁亥朔追封兄眞定縣開國
公子眞爲陳留王庚寅以鎮軍將軍金紫光祿
大夫李虔爲軍騎大將軍儀同三司特進辛卯
南荊州刺史李志據城南叛通直散騎常侍高
乾邕及弟等率合流民起兵於齊州之平原頻
破州軍詔東道大使元欣喻旨乃降是月葛榮
飢使其僕射任褒率車三萬餘乘南寇至沁水
癸卯以高昌王世子光爲平西將軍瓜州刺史
襲爵秦臨縣開國伯高昌王太尉公上黨王天

穆爲大都督東北道諸軍事率都督宗正珍孫
奚毅賀拔勝尔朱陽都等討任褒帝以寇難未
夷避正殿責躬撤膳又班募格收集忠勇其有
直言正諫之士敢決徇義之夫陳國家利害之
謀赴君親危難之節者集華林園面論事幽州
平北府主簿河間邢杲率河北流民十餘萬戶
反於青州之北海自署漢王號年天統戊申以
征東將軍金紫光祿大夫李叔仁爲車騎大將
軍儀同三司率衆討之詔直寢紀業持節募新

免牧戶有投名効力者授九品官己酉詔諸有
私馬仗從戎者職人優兩大階亦授實官白民
出身外優兩階亦授實官若武藝超倫者雖無
私馬亦依前條雖不超倫但射槊翹關一藝而
膽略有施者依第出身外特優一大階授實官
若無姓第者從八品出身階依前加特授實官
辛亥詔曰朕當親御六戎埽靜燕代大將軍太
原王介朱榮率精甲十萬為左軍上黨黑王天穆
摠衆八萬為前軍司徒公楊椿勒兵十萬為右

軍司空公穆紹統卒八萬爲後軍是月葛榮衆
退屯相州之北秋七月丁巳詔從四品以上從
征者不得優階正四品者優一階軍級從三品
以上從征四品者優一大階正五品以下還依
前格若有征階十餘計入四品三品限授五階
已未詔前試守 郡太守唐景宣爲持節都督
於東郡召募僑 民二千人渡河隨便爲柵
隄望臺軍是月齊獻武王於鄴西北慰喻葛榮
別帥稱王者七人衆萬餘降之乙丑加大將軍

宋榮桂國大將軍錄尚書事辛巳尚書奏斷
百官公給衣冠劍佩綬舄壬子光州人劉舉聚
衆數千反於濮陽自稱皇武大將軍是月高平
鎮人万俟醜奴僭稱大位署置百官是月臨淮
王彧自江南還朝八月太山太守羊侃據郡引
蕭衍將軍王僧辯攻兗州甲辰詔大都督宗正
珍孫率南廣州刺史都督鄭先護討劉舉於濮
陽破平之以侍中驃騎大將軍臨淮王彧爲儀
同三司是月葛榮率衆圍相州九月乙丑詔太

尉公上黨王天穆討葛榮次於朝歌之南己巳
以征東將軍齊州刺史元欣爲沛郡王壬申柱
國大將軍尔朱榮率騎七萬討葛榮於舍破
擒之餘衆悉降冀定滄瀛殷五州平乙亥平
葛榮大赦天下改爲永安元年辛巳以柱國大
將軍太原王尔朱榮爲大丞相都督河北畿外
諸軍事以榮子平昌郡開國公文殊昌樂郡公
文暢並進爵爲王以司徒公楊椿爲太保城陽
王徽爲司徒冬十月丁亥尔朱榮檻送葛榮於

京師帝臨闔闔門榮稽顙謝罪斬於都市丙申
以撫軍將軍太常卿太原王世子菩提爲使持
節驃騎大將軍開府儀同三司丁酉以冀州之
長樂相州之南趙定州之博陵滄州之浮陽平
州之遼西燕州之上谷幽州之漁陽七郡各萬
戶增封太原王尒朱榮爲太原國戊戌又加榮
太師庚戌以侍中鎮南將軍太原郡開國公于
暉兼尚書左僕射爲行臺與齊獻武王討羊侃
壬子太師江陽王繼薨癸丑以膠東縣開國侯

李傕希復其祖爵南郡王是月車騎大將軍儀
同三司李叔仁討邢杲於濰水失利而還大都
督費穆大破蕭衍軍擒其將曹義宗檻送京師
蕭衍以北海王顥爲魏主號年孝基入據南兗
之鉅城十有一月戊午以無上王世子詔爲彭城
王陳留王子寬爲陳留王寬弟剛爲浮陽王
剛弟質爲林慮王癸亥齊獻武王行臺于暉與
徐充行臺崔孝芬大都督刁宣大破羊侃於瑕
丘侃奔蕭衍兗州平戊寅以上黨王天穆爲大

魏書帝紀十
將軍開府世襲并州刺史封前將軍太中大夫
元凝爲東安王十有二月庚子詔行臺于暉回
師討邢杲次於歷下是歲葛榮餘黨韓樓復據
幽州反

二年春正月甲寅于暉所部都督彭樂率二千
餘騎北走於韓樓乃班師二月癸未朔詔諸禁
衛之官從戎有功及傷夷者赴選先叙甲午尊
皇考爲文穆皇帝廟號肅祖皇妣爲文穆皇后
燕州民王慶祖聚衆於上黨自稱爲王柱國大

將軍介朱榮討擒之壬寅詔散騎常侍濟陰王
暉業兼行臺尚書督都督李德龍丘大千鎮梁
國三月壬戌詔大將軍上黨王天穆與齊獻武
王討邢杲夏四月癸未遷肅祖文穆皇帝及文
穆皇后神主于太廟內外百寮普汎加一級曲
赦畿內死罪至流人減一等徒刑以下悉免庚
子詔太原王介朱榮下將士並汎加二級辛丑
上黨王天穆齊獻武王大破邢杲於齊州之濟
南杲降送京師斬於都市元顥攻陷考城執行

臺元暉業都督丘大千五月壬寅朔元顥克梁
國丁巳以撫軍將軍前徐州刺史楊昱爲使持
節鎮東將軍東南道大都督率衆鎮滎陽尚書
僕射尙朱世隆鎮虎牢侍中尙朱世承鎮崤峽
辛酉詔私馬仗從戎優階授官壬戌又詔募士
一依征葛榮甲子又詔職人及民出馬優階各
有差乙丑內外戒嚴癸酉元顥陷滎陽執楊昱
尙朱世隆棄虎牢遁還甲戌車駕北巡乙亥幸
河內丙子元顥入洛丁丑進封城陽縣開國公

元祉爲平原王安昌縣開國侯元鷲爲華山王
並加儀同三司戊寅行臺崔孝芬大都督刁宣
破元顥後軍都督侯暄於梁國斬之擒其卒三
千人以侍中車騎將軍尚書右僕射尒朱世隆
爲使持節行臺僕射本將軍相州刺史鎮鄴城
以便宜從事又詔上黨百年以下九十以上板
三品郡八十以上四品郡七十以上五品郡太
原王尒朱榮會車駕於長子即日反旆上黨王
天穆北渡會車駕於河內六月己丑儀同三司

費穆爲顯所害壬寅克河內斬太守元襲都督
宗正珍孫秋七月戊辰都督介朱兆賀拔勝從
硤石夜濟破顯子冠受及安豐王延明軍元顯
敗走庚午車駕入居華林園昇大夏門大赦天
下以使持節車騎將軍都督潁川郡開國公介
朱兆爲車騎大將軍儀同三司詔以前朝勲書多
竊冒宜一切焚棄之若立效灼然爲時所知者別
加科賞蕃客及邊酋翻城降有勲未叙者不在焚
斷之限北來軍士及隨駕文武諸立義加汎五

級河北執事之官二級河南立義及迎駕之官
并中途扈從亦二級壬申以柱國大將軍太原
王介朱榮爲天柱大將軍加前後部羽葆鼓吹
癸酉臨潁縣卒江豐斬元顥傳首京師甲戌以
大將軍上黨王天穆爲太宰司徒公城陽王徽
爲大司馬太尉公乙亥宴然刀天柱大將軍介朱
榮上黨王天穆及北來督將於都亭出宮人三
百繒錦雜綵數萬匹班賜有差又諸州郡遣使
奉表行宮者並加大階丁丑獲元顥弟斬

於都市詔受元顯爵賞階級悉追奪之己卯以
鎮東將軍南青州刺史元旭爲襄城王平南將
軍南兖州刺史元暹爲汝陽王閏月辛巳帝始
居宮內辛卯以車騎將軍兼吏部尚書楊津爲
司空巴州刺史嚴始欣據州南叛蕭衍遣其將
蕭玩張鴻江茂達等率衆赴援八月庚戌朔詔
諸有公私債負一錢以上巨萬以還悉皆禁斷
不得徵責己未以侍中大傅李延寔爲司徒公
丁卯封瓜州刺史元太榮爲東陽王甲戌侍中

太保楊椿致仕乙亥詔車騎將軍右光祿大夫
奚毅板授天柱大將軍介朱榮太宰天穆下勲
及祖父叔伯耆年者牧守有差九月大都督侯
淵討韓樓於薊破斬之幽州平万俟醜奴攻東
秦城陷之殺刺史高子朗冬十月丁丑以前司
空公丹陽王蕭贊爲司徒公十有一月己卯就
德興自營州遣使請降丁亥詔羣官休停在外
者皆令赴闕程會有差丙午以大司馬太尉公
城陽王徽爲太保司徒公丹陽王蕭贊爲太尉

公開府儀同三司雍州刺史長孫稚爲司徒公
十有二月辛亥蕭衍兗州刺史張景邕荊州刺
史李靈起雄信將軍蕭進明來降

三年春正月己丑益州刺史長孫壽梁州刺史
元雋等遣將與征巴州都督元景夏討嚴始欣
斬之蕭衍都督蕭玩何難尉陳愁敗走斬玩首
俘獲萬餘人辛丑東徐州城民呂文欣王赦等
殺刺史元太賓據城反以撫軍將軍都官尚書
樊子鵠兼右僕射爲行臺督征南將軍都督賈

顯智征東將軍徐州刺史嚴思達以討之二月
甲寅克之東徐平三月醜奴大行臺尉遲菩薩
寇岐州大都督賀拔岳可朱渾道元大破之夏
四月丁巳以侍中太尉公丹陽王蕭贊爲使持
節都督齊濟兗三州諸軍事驃騎大將軍開府
儀同三司齊州刺史丁卯雍州刺史介朱天光
討醜奴蕭寶夤於安定破擒之囚送京師甲戌
以關中平大赦天下醜奴斬於都市寶夤賜死
於馳牛署六月戊午詔胡民親屬受爵於朝者

黜附編民厭達國獻師子一是月白馬龍涸胡
王慶雲僭稱大位於永洛城署置百官秋七月
丙子天光平永洛城擒慶雲坑其城民一万七
千癸巳蕭衍民革虬卜湯世率堡聚內附庚子
車騎大將軍儀同三司李叔仁坐事除名爲民
九月辛卯天柱大將軍尒朱榮上黨王天穆自
晉陽來朝戊戌帝殺榮天穆於明光殿及榮子
儀同三司菩提乃昇閭闔門詔曰蓋天道忌盈
人倫嫉惡疎而不漏刑之無捨是以呂霍之門

禍譴所伏梁董之家咎徵斯在頃孝昌之末天
步孔艱女主亂政監國無主介朱榮爰自晉陽
同憂王室義旗之建大會盟津與世樂推共成
鴻業論其始圖非無勞效但致遠恐泥終之實
難曾未崇朝豺聲已露河陰之役安忍無親王
公卿士朝塗地宗戚靡遺內外俱盡假弄天
威殆危神器時事倉卒未遑問罪尋以葛賊橫
行馬首南向捨過責成用平醜虜及元顥問鼎
大駕北巡復致勤王展力行所以此論功且可

補過既位極宰衡地踰齊魯容養之至豈復是
過但心如猛火山林無以供其暴意等漏卮江
河無以充其溢既見金革稍寧方隅漸泰不推
天功專爲已力與奪任情臧否肆意無君之跡
日月以甚拔髮數罪蓋不足稱斬竹書愆豈云
能盡方復託名朝宗陰圖鸞逆睥睨天居窺覷
聖曆乃有裂冠毀冕之心將爲拔本塞源之事
天旣厭亂人亦悔禍同惡之臣密來投告將而
必誅罪無容捨又元天穆宗室末屬名望素微

遭逢際會頗參義舉不能竭其忠誠以奉家國
乃復棄本逐末背同即異爲之謀主成彼禍心
是而可忍孰不可恕並以伏辜自貽伊戚元惡
旣除人神慶泰便可大赦天下遣武衛將軍奚
毅前燕州刺史崔淵率兵鎮北中是夜僕射介
朱世隆榮妻鄉郡長公主率榮部曲焚西陽門
出屯河陰己亥攻河橋擒毅等於途害之據北
中城南逼京邑詔以驃騎大將軍雍州刺史廣
宗郡開國公介朱天光爲侍中儀同三司以待

中司空公楊津爲使持節督并肆燕恒雲朔顯
汾蔚九州諸軍事驃騎大將軍并州刺史兼尚
書令北道大行臺經略并肆庚子詔諸舊代人
赴華林園帝將親簡叙以撫軍將軍金紫光祿
大夫高乾邕爲侍中河北大使招集驍勇冬十
月癸卯朔封安南將軍大鴻臚卿元寶炬爲南
陽王太宗正卿汝陽縣開國公元脩爲平陽王
通直散騎常侍龍驤將軍新陽縣開國伯元誕
爲昌樂王復通直散騎常侍琅邪縣開國公李

叔仁官爵仍爲使持節大都督以討世隆以魏
郡王謏徙封趙郡王謏弟子趙郡王真改封平
昌王儀同三司李虔薨丁未班募攻河橋格賞
帛授官各有差戊申皇子生大赦天下文武百
寮汎二級以平南將軍中書令魏蘭根兼尚書
左僕射爲河北行臺定相殷三州稟蘭根節度
乙卯通直散騎常侍假平西將軍都督李苗以
火船焚河橋介朱世隆退走丙辰詔大都督兼
尚書僕射行臺源子恭率步騎一万出自西道

行臺楊昱領都督李侃希等部募勇士八千往
從東路防討之子恭仍鎮太行谷卅隆至建
州刺史陸希質拒守城陷盡屠之唯希質獲免
以中軍將軍前東荊州刺史元顯恭爲使持節
都督晉建南汾三州諸軍事鎮西將軍晉州刺
史兼尚書左僕射爲征西道行臺節度都督薛
善樂薛修義裴元雋薛崇禮薛禧族等丁卯詔
以卅隆北叛河內固守其在城督將文武普加
二級兵士給復三年壬申介朱卅隆停建興之

高都公朱兆自晉陽來會之共推太原太守行
并州刺史長廣王曄爲主大赦所部號年建明
普汎四級徐州刺史公朱仲遠反率衆向京師
十有一月癸酉朔詔車騎將軍左衛將軍鄭先
護爲使持節大將軍大都督與都督李侁希赴
行臺楊昱以討之乙亥以使持節兼尚書令西
道大行臺司徒公長孫稚爲太尉公侍中尚書
令驃騎大將軍開府儀同三司臨淮王彧爲司
徒公丙子以驃騎大將軍儀同三司雍州刺史

廣宗郡開國公朱天光開府進爵爲王丁丑
朱仲遠陷西兗州執刺史王衍癸未以右衛
將軍賀拔勝爲東征都督壬辰又以左衛將軍
大都督鄭先護兼尚書左僕射爲行臺與勝並
討仲遠戊戌詔罷魏蘭根行臺以後將軍定州
刺史薛曇尚爲使持節兼尚書爲北道行臺隨
機召發行豫州刺史元崇禮殺後行州事陰導
和擅攝豫州庚子賀拔勝與仲遠戰於滑臺東
失利仍奔之十有二月壬寅朔朱兆寇丹谷

都督崔伯鳳戰歿都督羊文義史五龍降北大
都督源子恭奔退甲辰尔朱兆尔朱度律自富
平津上率騎涉渡以襲京城事出倉卒禁衛不
守帝出雲龍門兆逼帝幸永寧佛寺殺皇子并
殺司徒公臨淮王彧左僕射范陽王誨戊申元
暉大赦天下尔朱度律自鎮京師甲寅尔朱兆
遷帝於晉陽甲子崩於城内三級佛寺時年二
十四并害陳留王寬是月河西人紇豆陵步蕃
破落韓常大敗尔朱兆於秀容齊州城人趙洛

周據西城反應亦朱兆刺史丹陽王蕭贇棄城走南陽太守趙脩延執荊州刺史李琰之自行州事中興二年諡爲武懷皇帝太昌元年又諡孝莊皇帝廟號敬宗十一月葬於靜陵

史臣曰魏自孝昌之末天下淆然外侮內亂神器固將無主莊帝潛思變化招納勤王雖時事孔棘而卒有四海猾逆旣翦權強擅命抑是兆謀運智之秋勞謙夕惕之日也未聞長轡之策遽深負刺之恐謀謨罕術授任乖方猜嫌行戮

禍不旋踵嗚呼胡醜之爲釁也豈周衰晉末而
已哉至於高祖不祀武宣享廟三后降鑒福祿
固不永矣

孝莊紀第十

魏書十

彙書終一

二

廢出三帝紀第十一 魏書十一

前廢帝廣陵王

後廢帝安定王

出帝平陽王

前廢帝諱恭字脩業廣陵惠王羽之子也母曰
王氏少端謹有志度長而好學事祖母嫡母以
孝聞正始中襲爵延昌中拜通直散騎常侍神
龜中進兼散騎常侍正光二年正常侍領給事
黃門侍郎帝以元義擅權遂稱疾不起久之因

託瘖病五年執除金紫光祿大夫加散騎常侍
建義元年除儀同三司王旣絕言垂將一紀居
於龍花寺無所交通永安末有白莊帝者言王
不語將有異圖民間遊聲又云有天子之氣王
懼禍逃匿上洛尋見追躡執送京師拘禁多日
以無狀獲免及莊帝崩尔朱世隆等以元曄疎
遠又非人望所推以王潛嘿晦身有過人之量
將謀廢立恐實不語乃令王所親申其意且兼
迫脅王遂荅曰天何言哉世隆等大悅春二月

己巳晦進至邛南世隆等奉王東郭之外行禪
讓之禮羣臣上表曰否泰訟時殷憂啓聖故六
飛在御三石興符伏惟陛下運屬年齡智周萬
物獨昭繫象妙極天人寶曆有歸光宅攸屬而
將安獨善不務兼濟靈命徘徊幽明載佇伏願
時順謳謠念茲宗祏用捨勞疾允荅人神王荅
曰自量眇身是以讓執然王公勤至不可拒違
今敬承所陳惟愧弗堪負荷耳太尉公介朱度
律奉進爾綬袞冕之服乃就輅車百官侍衛入

自建春雲龍門昇太極前殿羣臣拜賀禮畢登
闔闔門詔曰朕以寡薄撫臨萬邦思與億兆同
茲慶泰可大赦天下以魏爲大魏改建明二年
爲普泰元年其稅市及稅鹽之官可悉廢之百
雜之戶貸賜民名官任仍舊天下調絹四百一
匹内外文武普汎四階合叙未定第者亦沾
級除名免官者特復本資品封依舊潁川王介
朱兆彭城王介朱仲遠隴西王介朱天光樂平
王介朱世隆常山王介朱度律車騎大將軍儀

同三司齊獻武王都督斛斯椿下軍士普汎六
級庚午詔曰朕以眇身臨王公之上夕惕祇懷
若履冰谷賴七廟之靈百辟忠誠之舉庶免墜
歿夫三皇稱皇五帝云帝三代稱王迭冲挹也
自秦之末競爲皇帝忘負乘之深殃垂貪鄙於
万葉予今稱帝已爲褻矣可普星令知是月鎮
遠將軍清河崔祖螭聚青州七郡之衆十餘万
人圍東陽幽州刺史劉靈助起兵於薊撫軍將
軍金紫光祿大夫兼侍中河北大使高乾邕及

弟平北將軍通直散騎常侍敕曹率衆夜襲冀
州執刺史元疑殺監軍孫白鷄共推前河內太
守封隆之行州事三月癸酉封長廣王曄爲東
海王詔太師驃騎大將軍青州刺史魯郡王肅
還爲太師特進車騎大將軍沛郡王欣爲大傅
司州牧改封淮陽王驃騎大將軍開府儀同三
司徐州刺史彭城王尒朱仲遠驃騎大將軍儀
同三司雍州刺史隴西王尒朱天光並爲大將
軍柱國大將軍并州刺史潁川王尒朱兆爲天

柱大將軍驃騎大將軍儀同三司左衛將軍大
都督晉州刺史平陽郡開國公齊獻武王封勃
海王增邑五百戶特進車騎大將軍清河王亶
爲儀同三司侍中太傅驃騎大將軍開府儀同
三司尚書令樂平王尙朱世隆爲太保開府前
司徒公長孫稚爲太尉公錄尚書事侍中驃騎
大將軍開府儀同三司趙郡王諶爲司空公稚
固辭尋除驃騎大將軍開府儀同三司丙子帝
引見尚書右僕射元羅及皇宗於顯陽殿勞勉

之丁丑加驃騎大將軍北華州刺史公孫略儀
同三司己卯詔右衛將軍賀拔勝并尚書一人
募伎作及雜戶從征者正入出身皆授實官私
馬者優大階庚辰以侍中衛將軍咸陽王坦
衛將軍尚書左僕射南陽王寶炬侍中征東將
軍平陽王脩並儀同三司乙酉詔簡北來及在
京三官員外剩置者己丑以持節驃騎將軍涇
州刺史賀拔岳爲儀同三司岐州刺史使持節
車騎大將軍渭州刺史侯莫陳悅爲儀同三司

秦州刺史庚寅詔天下有德孝仁賢忠義志信者可以禮召赴闕不應召者以不敬論丙申劉靈助率衆次於安國城定州刺史侯淵破斬之傳首京師戊戌以使持節侍中車騎大將軍斛斯椿侍中衛將軍元受並特進儀同三司詔曰頃官方失序仍令沙汰定負簡剩已有判決退下之徒微亦可愍諸在簡下可特優一級皆授將軍預參選限隨能補用是春冠軍將軍南青州刺史茹懷朗使其部將何寶率步騎三千擊

蕭衍守將於琅邪擒其尚書左僕射儀同三司
雲麾將軍徐充二州刺史劉相如夏四月癸卯
幸華林都亭燕射班錫有差太樂奏伎有倡優
爲愚癡者帝以非雅戲詔罷之壬子有事於太
廟癸丑詔以齊獻武王爲使持節侍中都督冀
州諸軍事驃騎大將軍開府儀同三司大都督
東道大行臺冀州刺史驃騎大將軍安定王介
朱智虎爲開府儀同三司肆州刺史乙卯以右
衛將軍賀拔勝武衛將軍大野拔並爲儀同三

司己未帝於顯陽殿簡試通直散騎常侍散騎
侍郎通直郎剩負非才他轉之癸亥隴西王介
朱天光大破宿勤明達擒送京師斬之丙寅以
侍中驃騎大將軍介朱彥伯爲司徒公詔有司
不得復租僞梁罷細作之條無禁鄰國往還詔
負外諫議大夫步兵校尉奉車都尉羽林監給
事中積射將軍奉朝請殿中將軍宮門僕射殿
中司馬督治禮郎十一官得俸而不給力老合
外選者依常格其未老欲外選者聽解其七品

以上朔望入朝若正負有闕隨才進補前負外
簡退優階者追之稱事簡下者仍優二級先是
南陽太守趙脩延執刺史李琰之五月丙子荆
州城民斬脩延送首還推琰之爲刺史介朱仲
遠使其都督魏僧勗等討崔祖螭於東陽擒斬
之六月庚申齊獻武王以介朱逆亂始興義兵
於信都西定殷州斬其刺史介朱羽生命南趙
郡太守李元忠爲刺史鎮廣阿癸亥帝臨顯陽
殿 寃訟戊辰以使持節驃騎大將軍開府

介朱弼爲儀同三司秋七月壬申介朱世隆守
害前太保楊椿前司空公楊津及其家丙戌司
徒公介朱彥伯以旱遜位戊子除彥伯侍中開
府儀同三司庚寅以侍中太保開府尚書令樂
平王介朱世隆爲儀同三司位次上公八月庚
子詔隴西王介朱天光下文武討宿勤明達者
汎三級潁川王介朱兆率步騎二万出井陘趨
殷州李元忠棄城還信都丙午常山王介朱度
律彭城王介朱仲遠等率衆出抗義旗九月丁

丑以侍中驃騎將軍盧同驃騎大將軍杜德車
騎大將軍橋寧並爲儀同三司己卯以使持節
都督東道諸軍事兼尚書令東道大行臺彭城
王尒朱仲遠爲太宰庚辰加使持節大將軍都
督關中諸軍事兼尚書令西道大行臺隴西王
尒朱天光爲大司馬驃騎大將軍青州刺史開
府儀同三司穆紹薨癸巳追尊皇考爲先帝皇
妣王氏爲先太妃封皇弟永業爲高密王皇子
子恕爲勃海王冬十月壬寅齊獻武王推勃海

太守元朗即皇帝位於信都

二年春三月齊獻武王敗劖朱天光等於韓陵
夏四月辛巳齊獻武王與廢帝至邳山使魏蘭
根慰諭洛邑且觀帝之爲人蘭根忌帝雅德還
致毀謗竟從崔懷議廢帝於崇訓佛寺而立平
陽王脩爲帝帝旣失位乃賦詩曰朱門久可患
紫極非情翫顛覆立可待二年三易換時運正
如此唯有修真觀太昌初帝殂於門下外省時
年三十五出帝詔百司赴會大鴻臚監護喪事

三、四
葬用王禮加以九旒鑾輅黃屋左纛班劍百二十人二衛羽林備儀衛

後廢帝諱朗字仲哲章武王融第三子也母曰程氏少稱明悟永安二年爲肆州魯郡王後軍府錄事參軍儀同開府司馬元暉之建明二年正月戊子爲冀州勃海太守及齊獻武王起義兵將誅暴逆乃推戴之冬十月壬寅卽皇帝位於信都城西昇壇焚燎大赦稱中興元年文武百官普汎四級以齊獻武王爲侍中丞相都督

中外諸軍事大將軍錄尚書事大行臺增邑三
萬戶以兼侍中撫軍將軍河北大使高乾邕爲
侍中司空公前平北將軍通直散騎常侍高敖
曹爲驃騎大將軍儀同三司冀州刺史以終其
身以前刺史元疑爲儀同三司己酉介朱度律
介朱仲遠斛斯椿賀拔勝賈顯智次於陽平將
抗義師齊獻武王縱反間構之遂與介朱兆相
疑敗散而還辛亥齊獻武王大破介朱兆於廣
阿虜其卒五千餘人詔將士汎五級留守者二

級詔征東將軍吏部尚書封隆之爲使持節北
道大使隨方處分十有一月己巳詔曰王度朔
開彝倫方始所班官秩不改舊章而無識之徒
因茲僥倖謬增軍級虛名顯位皆言前朝所授
理難推抑自非嚴爲條制無以防其僞竊諸有
虛增官號爲人發紕罪從軍法若入格檢覈無
名者退爲平民終身禁錮庚辰齊獻武王率師
攻鄴城是年南兗城民王乞德逼前刺史劉世
明以州降蕭衍衍使其將元樹入據譙城

二年春正月壬午拔鄴擒刺史劉誕詔諸將士
汎四級封侯增邑九十七人各有差等癸未詔
曰自中興草昧典制權輿郡縣之官率多行督
假有正者風化未均眷彼周餘專爲漁獵朕所
以夙興夜寐有惕於懷有司明加糾罰稱朕意
焉二月辛亥上孝莊皇帝諡曰武懷皇帝甲子
以齊獻武王爲大丞相柱國大將軍太師增封
三萬戶并前爲六萬戶三月丙寅以齊文襄王
起家爲驃騎大將軍儀同三司丙子以待中車

騎大將軍尚書左僕射孫騰爲驃騎大將軍儀
同三司丁丑車駕幸鄴乙酉詔文武家屬自信
都赴鄴城閏月乙未爲安北將軍光祿大夫博
野縣開國伯尉景爲驃騎大將軍儀同三司丙
申以衛將軍金紫光祿大夫庫狄干爲車騎大
將軍儀同三司壬寅介朱天光兆度律仲遠等
屯於汜水之南癸丑齊獻武王出頓紫陌庚申
介朱兆率輕騎三千夜襲鄴城叩西門不尅退
走壬戌齊獻武王大破介朱天光等四胡於韓

陵前廢帝鎮軍將軍賀拔勝徐州刺史杜德於
陳降。朱兆走趣并州。仲遠奔東郡。天光度律
將赴洛陽。大都督斛斯椿賈顯智倍道先還。夏
四月甲子朔。椿等據河橋懼罪。自劾。尋擒天光
度律於河橋西北。大行臺長孫稚都督賈顯智
等率騎入京師。執朱世隆。彥伯斬於都街。囚
送天光度律於齊。獻武王辛未。前廢帝驃騎大
將軍行濟州事侯景據城降。仍除儀同三司兼
尚書僕射南道大行臺濟州刺史。甲戌。以車騎

將軍尚書右僕射魏蘭根爲驃騎大將軍儀同
三司乙亥以車騎大將軍儀同三司中軍大都
督高盛兼尚書僕射北道行臺隨機處分朱
仲遠奔蕭衍青州刺史朱弼爲其部下馮紹
隆所殺傳首京師丙子前廢帝安東將軍辛永
右將軍建州大都督張悅舉城降辛巳車駕至
河陽遜位於別邸太昌元年五月封安定郡王
邑一万户後以罪殂於門下外省時年二十一
永熙二年葬於鄴西南野馬岡

出帝諱脩字孝則廣平武穆王懷之第三子也
母李氏性沉厚少言好武事始封汝陽縣開國
公拜通直散騎侍郎轉中書侍郎建義初除散
騎常侍尋遷平東將軍兼太常卿又爲鎮東將
軍宗正卿永安三年封平陽王普泰初轉侍中
鎮東將軍儀同三司兼尚書右僕射又加侍中
尚書左僕射中興二年夏四月安定王自以疎
遠未允四海之心請遜大位齊獻武王與百寮
會議僉謂高祖不可無後乃共奉王戊子即帝

位於東郭之外入自東陽雲龍門御太極前殿
羣臣朝賀禮畢昇閭闔門詔曰否泰相公廢興
乎有玄天無所隱精靈弗能諭大魏統乾德漸
區寓牢籠九服旁礴三光而上天降禍運踵多
難禮樂崩淪憲章漂沒赫赫宗周翦爲戎寇肅
肅清廟將成茂草胡羯乘機肆其昏虐殺君害
王剝剔海內競其吞噬之意不識醉飽之心自
書契以來未有若斯者已大丞相勃海王忠存
本朝精貫白日爰舉義旗志雪國恥故廣阿之

軍貔虎奪氣鄴下之師金湯失險近者四胡相
率寔繁有徒驅天下之兵盡華戎之銳桴鼓暫
交一朝盪滅元兇授首大憝斯擒揚旆濟河掃
清伊洛士民安堵不失舊章社稷危而復安洪
基毀而還構朕以託體宸極猥當樂推祇握寶
圖承茲大業得以眇身託於王公之上若涉淵
水罔識攸津思與兆民同茲嘉慶可大赦天下
改中興二年爲太昌元年詔前御史中尉樊子
鵠起復本官兼尚書左僕射東南道大行臺都

督儀同三司徐州刺史杜德討元樹齊獻武王
上言建義之家枉爲介朱氏籍歿者悉免蠲免
帝以世易復除齊獻武王爲大丞相天柱大將
軍太師世襲定州刺史增封九万并前十五万
戶庚寅加齊文襄王侍中開府儀同餘如故壬
辰齊獻武王還鄴車駕餞別於乾脯山五月丙
申前廢帝廣陵王殂以太傅淮陽王欣爲太師
封沛郡王司徒公趙郡王諶爲太保侍中驃騎
大將軍開府儀同三司清河王亶儀同三司使

持節侍中驃騎大將軍開府儀同三司司州牧
南陽王寶炬爲太尉公侍中太保錄尚書事長
孫稚爲太傅侍中驃騎大將軍尚書左僕射元
羅儀同三司尚書令驃騎大將軍吏部尚書元
世儁儀同三司戊戌以齊獻武王固讓聽解天
柱大將軍減封五萬戶餘悉如故辛丑以前司
空高乾邕復爲司空公乙巳帝幸華林都亭宴
羣臣班賚有差羽林隊主唐猛突入稱慶帝以
猛犯禁衛杖之猛辭色有忤斬之階下丁未詔

曰無侮惇獨事炳前經惠此鰥寡聲留往冊朕
以薄德作民父母乃眷元元寤言增歎今理運
惟新哀矜伊始如有孤老疾病無所依歸者有
司明加隱括依格賑贍又詔曰理有一準則民
無覬覦法啓二門則吏多威福前主爲律後主
爲令歷世永久寔用滋章非所以準的庶品隄
防万物可令執事之官四品以上集於都省取
諸條格議定一途其不可施用者當局停記新
定之格勿與舊制相連務在約通無致冗滯已

西以待中驃騎大將軍儀同三司清河王亶爲
司徒公庚戌詔曰頃西土年飢百姓流徙或身
倚溝渠或命懸道路皆見棄草土最厭烏鳶言
念於此有警夜寐掩骼之禮誠所庶幾行瑾之
義冀亦可勉其諸有露屍令所在埋覆可宣告
天下乙卯詔外內解嚴六月癸亥朔帝於華林
園納訟丙寅蠕蠕嚙噓高麗契丹庫莫奚國並
遣使朝貢丁卯太尉公司州牧南陽王寶炬坐
事降爲驃騎大將軍開府王如故歸第令羽林

衛守改謚武懷皇帝曰孝莊癸酉蠕蠕獻國
遣使朝貢戊寅詔內外百司普汎六級在京百
寮加中興四級義師將士並加軍汎六級在鄴
百官三級河北同義之州兩級河橋建義者加
五級關西二級諸受建明普泰封爵汎級優特
之階悉追已卯帝臨顯陽殿納訟乙酉高麗契
丹庫莫奚國遣使朝貢丙戌以前驃騎大將軍
開府儀同三司斛斯椿還爲前官詔曰間者凶
權誕恣法令變常遂立夷貊輕賦冀收天下之

意隨以箕斂之重終納十倍之征掩目捕雀何
能過此朕屬念蒸黎無忘寢食加田桑始事生
業未滋若頓依常格或不周展今歲租調且兩
收一丐來年復舊辛卯以使持節衛大將軍儀
同三司尚書左僕射賈顯度爲驃騎大將軍開
府儀同三司秋七月乙未詔曰頃永安馭運載
育皇儲遂錫汎階以申國慶近經普泰便爾中
追今罪人旣殄舊章斯復宜述往旨用卒前恩
皇子汎二級悉可還授文穆廟汎故宜停寢若

已受者依例追之庚子以驃騎大將軍開府南陽王寶炬爲太尉公壬寅齊獻武王率衆入自滏口大都督庫狄干入自井陘討尙朱兆乙巳齊獻武王以尙朱天光尙朱度律送之京師斬於都市己酉以兼尚書左僕射東南道大行臺樊子鵠爲儀同三司庚戌詔侍中驃騎將軍左光祿大夫高隆之爲使持節驃騎大將軍儀同三司兼尚書左僕射北道行臺率步騎十萬趨太行會齊獻武王隆之劄行臺仍爲大丞相軍

司齊獻武王次於武鄉。朱兆大掠晉陽北走。
秀容并州平乙卯。帝臨顯陽殿親理冤獄。丙辰。
以宗師東萊王貴平爲車騎大將軍。儀同三司。
是月。夏州徙民郭遷據宥州。反。刺史元嶷棄城。
走。詔行臺侯景率齊州刺史尉景濟州刺史蔡
雋等攻討之。城陷。遷奔蕭衍。東南道大行臺樊
子鵠大破蕭衍軍於譙城。擒其鄴王元樹及譙
州刺史朱文開。八月壬戌朔。齊文襄王來朝燕。
射班賚部下各有差。丁卯。以西中郎將元寧爲

高平王甲戌以車騎大將軍左光祿大夫李琰
之爲儀同三司庚寅以車騎將軍左光祿大夫
崔秉爲驃騎大將軍儀同三司辛卯以車騎將
軍右光祿大夫高岳爲驃騎大將軍儀同三司
九月癸未以侍中驃騎大將軍左光祿大夫封
津爲儀同三司庚子帝幸華林都亭引見元樹
及公卿百寮蕃使督將等宴射班賚各有差癸
卯燕郡開國公賀拔允進爵爲王乙巳帝幸都
水南過洛汭遂至瀍澗己酉復田于北原癸丑

以太師沛王欣爲廣陵王前廢帝子勃海王子
恕改封沛郡王甲寅以侍中驃騎大將軍封陰
之任祥並爲儀同三司以車騎大將軍河南尹
元仲景爲驃騎大將軍儀同三司乙卯車駕謁
山陵丙辰蠕蠕高昌國遣使朝貢庚申以衛將
軍前吏部尚書李神雋撫軍將軍右衛將軍婁
昭並爲驃騎大將軍儀同三司冬十月甲子以
使持節衛將軍光州刺史高仲密爲車騎大將
軍儀同三司丁卯以車騎大將軍左光祿大夫

潘蠻爲儀同三司己卯以車騎大將軍左光祿
大夫高琛爲特進驃騎開府儀同三司庚寅以
使持節驃騎將軍肆州刺史劉貴爲驃騎大將
軍儀同三司十有一月甲午以車騎將軍楊州
刺史斛斯敦爲驃騎大將軍儀同三司丁酉日
南至車駕有事於圓丘戊戌朝會百官於太極
前殿甲辰安定王朗及東海王曄坐事死乙巳
蠕蠕國遣使朝貢己酉以前太尉公汝南王悅
爲侍中大司馬開府葬靈太后胡氏十有二月

丙寅以驃騎大將軍領御史中尉綦儁爲儀同
三司乙亥以侍中廣平王贊爲驃騎大將軍開
府儀同三司丁亥殺大司馬汝南王悅大赦天
下改太昌爲永興以太宗號尋改爲永熙元年
二年春正月庚寅朔朝饗羣臣于太極前殿甲
午齊獻武王自晉陽出討余朱兆丁酉大破之
於赤洪嶺兆遁走自殺己亥車駕幸崧高石窟
靈巖寺庚子又幸散施各有差庚戌儀同三司
李琰之薨丁巳追尊皇考爲武穆帝皇太妃馮

氏爲武穆后皇妣李氏爲皇太妃以驃騎將軍
前滄州刺史高聿爲驃騎大將軍儀同三司蕭
衍勞州刺史曹鳳東荊州刺史雷能勝等舉城
內屬二月庚申以使節鎮東將軍行汾州事
張瓊爲驃騎大將軍儀同三司辛酉以司空公
高乾邕爲使持節驃騎大將軍開府儀同三司
咸陽王坦爲司空公三月己丑朔加驃騎大將
軍滄州刺史賈顯智開府儀同三司辛卯詔以
前普解諸行臺今阿至羅相率降款復以齊獻

武王爲大行臺隨機裁處甲午以車騎將軍蔚
州刺史竇泰爲使持節車騎大將軍開府儀同
三司相州刺史使持節驃騎大將軍開府儀同
三司徐州刺史高乾筮坐事賜死太師魯郡王
肅薨戊申以使持節都督河渭部三州諸軍事
驃騎大將軍世襲河州刺史梁景叡爲儀同三
司丁巳以侍中太保司州牧趙郡王諶爲太尉
公加羽葆鼓吹侍中太尉公南陽王寶炬爲太
尉開府尚書令夏四月戊辰詔諸叅佐自三府

以下爰及外州皆不得復加常侍及兼兩貲雖
已授者亦悉追之是月青州人耿翔襲據膠州
殺刺史裴粲通於蕭衍五月庚寅詔諸幽枉未
申事經一周已上悉集華林將親覽察脫事已
經年有司不列者聽其人各自陳訴若事連州
郡由緣淹歲者亦仰尚書摠集以聞壬寅以使
持節驃騎大將軍儀同三司齊州刺史侯淵復
爲開府儀同三司乙巳詔曰大夫之職位秩貴
顯貧外之官亦爲匪賤而下及胥吏帶領非一

高卑渾雜有損彝章自今已後京官樂為稱事
小職者直加散號將軍願罷卑官者聽為大夫
及員外之職不宜仍前散實叅領其中旨特加
者不在此例東徐州城民王早簡實等殺刺史
崔庠據州入蕭衍六月壬申以驃騎大將軍開
府儀同三司尚書右僕射樊子鵠為青膠大使
督濟州刺史大都督蔡儁討耿翔丁丑以驃騎
大將軍前行南兗州事念賢為儀同三司秋七
月辛卯以使持節鎮北將軍大都督泰州刺史

萬俟普撥為驃騎大將軍儀同三司壬辰以太
師司州牧廣陵王欣為大司馬侍中以太尉公
趙郡王諶為太師並開府庚戌以前司徒公燕
郡王賀拔允為太尉公八月乙丑齊文襄王來
朝帝燕於華林都亭班賚部下各有差以驃騎
大將軍前南岐州刺史司馬子如為儀同三司
戊辰車駕餞文襄王於河梁仍濟河而返癸酉
齊獻武王上表固讓主爵不許請分邑十萬戶
節降為品回授勲義從之九月壬子以散騎常

侍車騎大將軍左光祿大夫崔孝芬爲儀同三
司冬十月癸未以衛將軍瓜州刺史泰臨縣開
國伯高昌王麴子堅爲儀同三司進爵郡王十
有一月癸巳持節征北將軍殷州刺史邱珍爲
徐州大都督東道行臺僕射率將討東徐州十
有二月丁巳車駕狩於嵩陽巳巳遂幸溫湯丁
丑車駕還宮

三年春正月壬辰齊獻武王討費也頭於河西
苦洩河大破之獲其帥紇豆陵伊利遷其部落

於內地二月東梁州爲夷民侵逼詔使持節車
騎大將軍行東雍州事泉企爲東梁州行臺都
督以討之己未蕭衍假節豫州刺史南昌王毛
香舉城內附授以持節安南將軍信州刺史義
昌王壬戌大赦天下丙子帝親釋奠禮先師辛
巳幸洪池陂遂遊田壬午以衛將軍前徐州刺
史元祐爲衛大將軍儀同三司以驃騎將軍左
衛將軍元斌之爲潁昌王三月壬寅以前侍中
車騎大將軍李彧爲驃騎大將軍儀同三司夏

四月戊午契丹國遣使朝貢辛未高平王寧坐
事降爵爲公丙子高麗國遣使朝貢五月丙戌
增置勲府庶子廂別六百人又增騎官廂別二
百人依第出身騎官秩比直齋辛卯詔曰大魏
得一居宸乘六馭寓考風雲之所會宅日月之
所中自北而南東征西怨后來其蘇無思不偃
而句吳負險久遺度外世祖太武皇帝握金鏡
以照耀擊玉鼓以鏗鏘神武之所牢籠威風之
所輔轡莫不雲徹霧卷瓦解冰消長江已北盡

爲魏土頃天步中圯國綱時屯凶豎因機平窺
上國疆場侵噬州郡淪胥乃眷東顧無忘寢食
自非五牛警旆七萃按部何以復文武之舊業
拯塗炭於遺黎朕將親撫六軍徑臨彭汴一勞
永逸庶保無疆內外百寮便可嚴備出頓之期
更聽後勅時帝爲斛斯椿元毗王思政魏光等
諂佞間阻貳於齊獻武王託討蕭衍盛暑徵發
河南諸州之兵天下恠惡之語在斛斯椿傳丙
申以使持節侍中大司馬開府司州牧廣陵王

欣爲左軍大都督太傅錄尚書事長孫稚爲中
軍四面大都督丁酉帝幸華林都亭集京畿都
督及軍士三千餘人慰勉之庚子又幸華林都
亭納訟壬寅又以長孫稚爲後軍大都督六月
丁卯大都督源子恭鎮胡陽汝陽王暹守石濟
儀同三司賈顯智率豫州刺史斛斯壽東趨濟
州庚午吐谷渾國遣使朝貢丙子詔曰頃年以
來天步時阻干戈不戢荊棘斯生或徇節感恩
奮不顧命或臨戎對敵赴難如歸身首橫分骸

骨不斂歟誠靡錄榮贈莫加寤寐矜之良有嗟
悼可曾告內外所在言列若無親近聽故友陳
之尚書檢實隨狀科贈庶粗慰冤魂少申惻隱
庚辰以使持節車騎大將軍中軍大都督斛律
沙門爲開府儀同三司秋七月辛巳朔以鎮東
將軍前大鴻臚卿太原王昶特爲車騎大將軍
儀同三司己丑帝親撫六軍十餘萬衆次於河
橋以斛斯椿爲前軍大都督尋詔椿鎮虎牢又
詔荊州刺史賀拔勝赴於行所勝率所部次於

汝水庚子以使持節征西將軍岐州刺史越肱
特爲儀同三司丁未帝爲椿等迫脅遂出於長
安己酉齊獻武王入洛賀拔勝走還荊州八月
甲寅推司徒公清河王亶爲大司馬承制摠萬
幾居尚書省辛酉齊獻武王西迎車駕戊辰制
曰晦爲明始亂實治基爰著天道又符人事故
姬祚中微踐土有勤王之役劉氏將傾北軍致
左袒之舉用能隆此遠年克茲卜世永熙之季
權佞擅朝羣小是崇勲賢見害官緣價賈賤

獄因貨而死生宗祏飄若綴旒民命棄如草莽
大丞相位居晉鄭任屬栢文興甲汾川問罪伊
洛羣姦畏威擁迫人主以自蔽衛遠出秦方雖
車駕流移未即返御然權佞將除天下延頸魏
邦雖舊其化惟新思與兆民同茲更始可大赦
天下行臺侯景討荊州賀拔勝戰敗走奔蕭衍
九月癸巳以衛大將軍河南尹元子思爲使持
節行臺僕射使持節驃騎大將軍開府儀同三
司領軍將軍婁昭爲西道大都督并率左右侍

官西迎車駕已酉椿黨毛鴻賓守潼關齊獻武
王破擒之是日齊獻武王東還於洛是月東清
河人傅鼎殺太守韓子捷據郡反會赦乃降冬
十月戊辰使持節驃騎大將軍開府儀同三司
行青州事侯淵克東楊州斬刺史東萊王貴平
傳首京師閏十二月癸巳帝爲宇文黑獺所害
時年二十五

史臣曰廣陵廢於前中興廢於後平陽猜惑自
絕宗廟晉泰雅道居多永熙悖德爲甚是俱

亡滅天下所棄歟

廢出三帝紀第十一

魏書十一

孝靜紀第十二

魏書十二

孝靜皇帝諱善見清河文宣王亶之世子也母

胡妃永熙三年拜通直散騎侍郎八月爲驃

騎大將軍開府儀同三司出帝旣入關齊獻武

王奉迎不克乃與百寮會議推帝以奉肅宗之

後時年十一冬十月丙寅即位于城東北大赦

天下改永熙三年爲天平元年庚午以太師趙

郡王諶爲大司馬以司空咸陽王坦爲太尉以

開府儀同三司高盛爲司徒以開府儀同三司

高昂爲司空壬申有事于太廟詔曰安安能遷
自古之明典所居靡定往昔之成規是以殷遷
八城周卜三地吉凶有數隆替無恒事由於變
通理出於不得已故也高祖孝文皇帝式觀乾
象俯協人謀發自武州來幸嵩縣魏雖舊國其
命惟新及正光之季國步孔棘喪亂不已寇賊
交侵俾我生民無所措手今遠遵古式深驗時
事考龜蓍吉遷宅漳滏庶克隆洪基再昌寶曆
主者明爲條格及時發邁丙子車駕北遷于鄴

詔齊獻武王留後部分改司州爲洛州以衛大將軍尚書令元弼爲驃騎大將軍儀同三司洛州刺史鎮洛陽詔從遷之戶百官給復三年安居人五年十有一月兗州刺史樊子鵠南青州刺史大野拔據瑕丘反庚寅車駕至鄴居北城相州之廨改相州刺史爲司州牧魏郡太守爲魏尹徙鄴舊人西徑百里以居新遷之人分鄴置臨漳縣以魏郡林慮廣平陽丘汲郡黎陽東濮陽清河廣宗等郡爲皇畿十有二月丁卯燕

郡王賀拔允薨庚午詔內外解嚴百司悉依舊
章從容雅服不得以矛鉞從事丙子遣侍中封
隆之等五人爲大使巡諭天下丁丑赦畿內閏
月蕭衍以元慶和爲鎮北將軍魏王入據平瀨
鄉宇文黑獺旣害出帝乃以南陽王寶炬僭尊
號初置四中郎將於礪石橋置東中蒲泉置西
中濟北置南中洛水置北中

二年春正月寶炬渭州刺史可朱渾道元擁部
來降齊獻武王迎納之賑其廩食己巳詔以齊

獻武王爲相國假黃鉞劔履上殿入朝不趨餘悉
如故王固讓不受乙亥兼尚書右僕射東南道
行臺元晏討元慶和破走之三月壬午以太尉
咸陽王坦爲太傅以司州牧西河王悰爲太尉
己丑前南青州刺史大野拔斬樊子鵠以降兗
州平戊戌蕭衍司州刺史陳慶之寇豫州刺史
堯雄擊走之三月辛酉以司徒高盛爲太尉以
司空高昂爲司徒濟陰王暉業爲司空齊獻武
王討平山胡劉蠡舛斬之其子南海王復僭帝

號獻武王進擊破擒之及其弟西海王皇后夫
人已下四百人并逋逃之人二萬餘戶辛未以
旱故詔京邑及諸州郡縣收瘞骸骨是春高麗
契丹並遣使朝貢夏四月前青州刺史侯梁反
攻掠青齊癸未濟州刺史蔡雋討平之王辰降
京師見囚五月大旱勒城門殿門及省府寺署
坊門澆人不簡王公無限日得雨乃止六月元
慶和寇南豫州刺史堯雄大破之秋七月甲戌
封汝南王悅子綽爲琅邪王八月辛卯司空濟

陰王暉業坐事免甲午發衆七万六千人營新
宮九月齊獻武王以治民之官多不奉法請選
朝士清正者州別遣一人問疾苦丁巳以開府
儀同三司襄城王旭爲司空冬十有一月丁未
蕭衍將柳仲禮寇荊州刺史王元擊破之癸丑
祀圓丘甲寅閭闔門災龍見并州人家井中丙
寅詔齊文襄王起家爲散騎常侍驃騎大將軍
左光祿大夫儀同三司太原郡開國公食邑三
千戶十有二月壬午車駕狩于鄴東甲午文武

百官量事各給祿

三年春正月癸卯朔饗羣臣於前殿戊申詔百官舉士舉不稱才者兩免之齊獻武王襲寶炬西夏州克之詔加齊獻武王九錫之禮侍中元子思敦諭固讓乃止二月丁未蕭衍光州刺史郝樹以州內附丁酉詔加齊文襄王使持節尚書令大行臺大都督以鮮卑高車酋庶皆隸之三月甲寅以開府儀同三司華山王鷩爲大司馬丁卯陽夏太守盧公纂據郡南叛大都督元

整破之夏四月丁酉昌樂王誕薨五月癸卯賜
鰥寡孤獨貧窮者衣物各有差丙辰以錄尚書
事西河王恂爲司州牧戊辰太尉高盛薨六月
辛巳趙郡王諶薨秋七月庚子大赦天下蕭衍
夏州刺史田獨鞞潁川防城都督劉鸞慶並以
州內附八月并肆涿建四州隕霜大飢九月壬
寅以定州刺史侯景兼尚書右僕射南道行臺
節度諸軍南討丙辰陽平人路季禮聚衆反辛
酉御史中尉竇泰討平之冬十有一月戊申詔

尚書可遣使巡檢河北流移飢人邢陘隘口所
經之處若有死屍即爲藏掩勿使靈臺枯骨有
感於通夢廣漢露骸時聞於夜哭倭景攻克蕭
衍楚州獲刺史桓和十有二月以并州刺史尉
景爲太保辛未遣使者板假老人官百歲已下
各有差壬申大司馬清河王亶薨丁丑齊獻武
王自晉陽西討次於蒲津司徒公大都督高敖
曹趨上洛車騎大將軍竇泰入自潼關癸未以
太傅咸陽王坦爲太師乙酉勿吉國遣使朝貢

是歲高麗國遣使朝貢

四年春正月禁十五日相偷戲竇泰失利自殺
丁巳高敖曹攻上洛克之擒寶炬驃騎大將軍
洛州刺史梁企以汝陽王暹爲錄尚書事夏四
月辛未遷七帝神主入新廟大赦天下內外百官
普進一階先是滎陽人張儉等聚衆反於大醜
山通寶炬壬辰武衛將軍高元盛討破之六月
己巳幸華林園理訟辛未詔尚書掩骼埋骸推
錄囚徒壬午閭闔門災先是蕭衍因益州刺史

傳和請通好秋七月甲辰遣兼散騎常侍李楷
兼吏部郎中盧元明兼通直散騎常侍李鄴使
于蕭衍八月寶炬宇文黑獺寇陝州城陷刺史
史李徽伯爲黑獺所殺九月侍中元子思與其
弟子華謀西入並賜死閏月乙丑衛將軍右光
祿大夫蔣天樂謀反伏誅禁京酤酒冬十月以
咸陽王坦爲錄尚書事壬辰齊獻武王西討至
沙苑不克而還己酉寶炬行臺宮景壽都督楊
白駒寇洛州大都督韓延大破之寶炬又遣其

子大行臺元季海大都督獨孤如願逼洛州刺史廣陽王湛棄城退還季海如願遂據金墉潁州長史賀若微執刺史田迅西叛引寶炬都督梁回據城寶炬又遣其都督趙繼宗右承韋孝寬等攻陷豫州十有一月丙子以驃騎大將軍儀同三司万俟普爲太尉十有二月甲寅蕭衍遣使朝貢河閒人邢摩納范陽人盧仲禮等各聚衆反是歲高麗蠕蠕國並遣使朝貢

元象元年春正月有巨象自至碭郡陂中南兗

州獲送于鄴丁卯大赦改元大都督賀拔仁攻
寶炬南汾州己卯拔之擒其刺史韋子粲行臺
任祥率豫州刺史堯雄等與大行臺侯景司徒
高敖曹大都督万俟受洛干等於北豫相會俱
討潁州梁回等棄城遁走潁州平二月豫州刺史
堯雄攻楊州拔之擒寶炬義州刺史韓顯揚州
長史丘岳送京師丙辰遣兼散騎常侍鄭伯猷
使于蕭衍三月齊獻武王固請解大丞相詔從
之夏四月庚寅曲赦畿內壬辰齊獻武王還晉

陽請開酒禁六月壬辰帝幸華林都堂聽訟是
夏山東大水蝦蟆鳴于樹上秋七月己亥高麗
國遣使朝貢行臺侯景司徒公高敖曹圍寶炬
將獨孤如願於金墉寶炬宇文黑獺並來赴救
大都督庫狄干率諸將前驅齊獻武王摠衆繼
進八月辛卯戰于河陰大破之斬其大都督儀
同三司寇洛生等二十餘人俘獲數万司徒公
高敖曹大都督李猛宋顯並戰沒寶炬留其將
長孫子彥守金墉壬辰齊獻武王濟河子彥棄

城走九月大都督賀拔仁擊邢摩納盧仲禮等
破平之冬十月蕭衍遣使朝貢十有一月庚寅
遣陸操使于蕭衍齊獻武王來朝十有二月甲
辰還晉陽

興和元年春正月辛酉以尚書令孫騰為司徒
三月甲寅朔封常山郡王劼第二子曜為陳郡
王夏五月齊文襄王來朝甲戌立皇后高氏乙
亥大赦天下是月高麗國遣使朝貢六月乙酉
以尚書左僕射司馬子如為山東黜陟大使尋

爲東北道大行臺差選勇士庚寅前潁州刺史
奚思業爲河南大使簡發勇士丁酉蕭衍遣使
朝貢戊申開府儀同三司汝陽王暹薨秋七月
丁丑詔以齊獻武王爲相國錄尚書事大行臺
固辭相國八月壬辰兼散騎常侍王元景薨通
直散騎常侍魏收使于蕭衍九月甲子發畿內
民夫十萬人城鄴城四十日罷辛未曲赦畿內
死罪以下各有差冬十有一月癸亥以新宮成
大赦天下改元八十以上賜綾帽及杖七十以

上賜帛及有疾廢者賜粟帛築城之夫給復一年

二年春正月壬申以太保尉景爲太傅以驃騎大將軍開府儀同三司庫狄干爲太保丁丑徙御新宮大赦内外百官普進一階營構主將別優一階三月己卯蕭衍遣使朝貢夏五月己酉西魏行臺宮延和陝州刺史宮元慶率户内屬置之河北新附賑廩各有差壬子遣兼散騎常侍李象使于蕭衍閏月己丑封皇子景植爲宜

陽王皇弟威爲清河王謙爲潁川王六月壬子
大司馬華山王鷲薨冬十月丁未蕭衍遣使朝
貢十有二月乙卯遣兼散騎常侍崔長謙使於
蕭衍是歲蠕蠕高麗勿吉國並遣使朝貢

三年春二月甲辰阿至羅出吐拔那渾太率部
來降三月己酉梁州人公孫貴賓聚衆反自號
天王陽夏鎮將討擒之夏四月戊申阿至羅國
主副伏羅越居子去賓來降封爲高車王六月
乙丑蕭衍遣使朝貢秋七月齊文襄王如晉陽

己卯宜陽王景植薨八月甲子遣兼散騎常侍
李騫使于蕭衍冬十月癸卯齊文襄王自晉陽
來朝先是詔文襄王與羣臣於麟趾閣議定新
制甲寅班於天下己巳發夫五万人築漳濱堰
三十五日罷癸亥車駕狩于西山十有一月戊
寅還宮丙戌以開府儀同三司彭城王韶爲太
尉以度支尚書胡僧敬爲司空是歲蠕蠕高麗
勿吉國並遣使朝貢

四年春正月丙辰蕭衍遣使朝貢夏四月丙寅

遣兼散騎常侍李繪使于蕭衍乙酉以侍中廣
陽王湛爲太尉以尚書右僕射高隆之爲司徒
以太尉彭城王韶爲錄尚書事丁亥太傅尉景
坐事降爲驃騎大將軍開府儀同三司辛卯以
太保庫狄干爲太傅以領軍將軍婁昭爲大司
馬封祖裔爲尚書右僕射五月辛巳齊獻武王
來朝請令百官月一而敷政事明揚仄陋納諫
屏邪親理獄訟褒黜勤怠牧守有愆節級相坐
椒掖之內進御以序後園鷹犬悉皆放棄六月

還晉陽丙申復前侍中樂浪王忠爵丁酉復陳
留王景皓常山王紹宗高密王永業爵秋八月
庚戌以開府儀同三司吏部尚書侯景為兼尚
書僕射河南行臺隨機討防冬十月甲寅蕭衍
遣使朝貢齊獻武王圍寶炬玉壁十有一月壬
午班師驃騎大將軍開府儀同三司青州刺史
西河王恂薨十有二月辛亥遣兼散騎常侍楊
斐使于蕭衍是歲蠕蠕高麗吐谷渾國並遣使
朝貢

武定元年春正月壬戌朔大赦天下改元己巳
車駕蒐于邯鄲之西山癸酉還宮三月壬申北
豫州刺史高仲密據虎牢西叛三月寶炬遣其
子突與宇文黑獺率衆來援仲密庾子圍河橋
南城丙午帝親納訟戊申齊獻武王討黑獺戰
於邛山大破之擒寶炬兄子臨洮王森蜀郡王
榮宗江夏王昇鉅鹿王闡譙郡王亮驃騎大將
軍儀同三司太子詹事趙善督將參寮等四百
餘人俘斬六萬餘甲仗牛馬不可勝數豫洛二

州平齊獻武王追奔至恒農而還夏四月封彭
城王韶弟襲爲武安王五月壬辰以克復虎牢
降天下死罪以下囚乙未以吏部尚書侯景爲
司空六月乙亥蕭衍遣使朝言戊寅封前負外
散騎侍郎元長春爲南郡王秋八月乙未以汾
州刺史斛律金爲大司馬壬午遣兼散騎常侍
李渾使于蕭衍是月齊獻武王召夫五萬於肆
州北山築城西自馬陵戍東至土陞四十日罷
冬十有一月甲午車駕狩于西山乙巳還宮是

歲吐谷渾高麗蠕蠕國並遣使朝貢

二年春正月地豆于國遣使朝貢二月丁卯徐州人劉烏黑聚衆反遣行臺慕容紹宗討平之三月蕭衍遣使朝貢以旱故宥死罪以下囚丙午以開府儀同三司孫騰爲太保壬子以齊文襄王爲大將軍領侍中其文武職事賞罰衆典詢稟之中書監元弼爲錄尚書左僕射司馬子如爲尚書令以今上爲右僕射夏四月室韌國遣使朝貢五月甲午遣散騎常侍魏季景使于

蕭衍丁酉太尉廣陽王湛薨秋八月癸酉尚書
令司馬子如坐事免九月甲申以開府儀同三
司濟陰王暉業爲太尉太師咸陽王坦坐事免
以王還第冬十月丁巳太保孫騰大司馬高隆
之各爲括戶大使凡獲逃戶六十餘万十有一
月西河地陷有火出甲申以司徒高隆之爲尚
書令以前大司馬婁昭爲司徒齊文襄王如晉
陽庾子車駕有事於圓丘辛丑蕭衍遣使朝貢
壬寅齊文襄王從獻武王討山胡破之俘獲一

萬餘戶分配諸州是歲吐谷渾高麗蠕蠕勿吉
國並遣使朝貢

三年春正月丙申遣兼散騎常侍李獎使于蕭
衍丁未齊獻武王請於并州置晉陽宮以處配
沒之口二月庚申吐谷渾國奉其從妹以備後
庭納爲容華嬪夏五月甲辰大赦天下秋七月
庚子蕭衍遣使朝貢冬十月遣中書舍人尉瑾
使于蕭衍乙未齊獻武王請邛山之俘釋其桎
梏配以人閒寡婦十有二月以司空侯景爲司

三〇リ
徒以中書令韓軌爲司空戊子以太保孫騰爲
錄尚書事是歲高麗吐谷渾蠕蠕國並遣使朝
貢

四年夏五月壬寅蕭衍遣使朝貢六月庚子以
司徒侯景爲河南大行臺應機討防秋七月壬
寅遣兼散騎常侍元廓使于蕭衍八月移洛陽
漢魏石經于鄴齊獻武王自鄴帥衆西伐文襄
王會于晉州九月圍玉壁以挑之寶炬黑獺不
敢應冬十有一月齊獻武王有疾班師文襄王

如晉陽是歲室韋勿吉地豆于高麗蠕蠕國並遣使朝貢

五年春正月丙午齊獻武王薨於晉陽秘不發喪辛亥司徒侯景反潁州刺史司馬世雲以城應之景入據潁城誘執豫州刺史高元成襄州刺史李密廣州刺史暴顯等遣司空韓軌驃騎大將軍儀同三司賀拔勝可朱渾道元左衛將軍劉豐等帥衆討之景乃遣使降於寶炬請師救援寶炬遣其將李景和王思政帥騎赴之思

政等入據潁川景乃出走豫州乙丑蕭衍遣使
朝貢二月侯景復背寶炬歸於蕭衍衍署景河
南大將軍承制夏四月壬申大將軍齊文襄王
來朝甲午遣兼散騎常侍李緯使于蕭衍五月
丁酉朔大赦天下戊戌以尚書右僕射襄城王
旭爲太尉甲辰以太原公今上爲尚書令領中
書監餘如故詢以政事以青州刺史尉景爲大
司馬以開府儀同三司庫狄干爲太師以錄尚
書事孫騰爲太傅以汾州刺史賀仁爲太保以

司空韓軌爲司徒以領軍將軍可朱渾道元爲
司空以司徒高隆之錄尚書事以徐州刺史慕
容紹宗爲尚書左僕射高陽王斌爲右僕射戊
午大司馬尉景薨六月司徒韓軌司空可朱渾
道元等自潁州班師乙酉帝爲齊獻武王舉哀
於東堂服總纓詔尚書右僕射高陽王斌兼大
鴻臚卿赴晉陽監護喪事太尉襄城王旭兼尚
書令奉詔宣慰秋七月戊戌詔贈王假黃鉞使
持節相國都督中外諸軍事齊王璽紱輶輶車

黃屋左纛前後羽葆鼓吹輕車介士兼備九錫
之禮諡曰獻武王以齊文襄王爲使持節大丞
相都督中外諸軍事錄尚書事大行臺敦海王
壬寅詔王攝理軍國遣中使敦諭八月齊文襄
王入朝固辭丞相詔復授大將軍餘如故甲申
葬齊獻武王於鄴城西北車駕祖於漳濱九月
齊文襄王還晉陽辛酉蕭衍遣其兄子貞陽侯
淵明帥衆寇徐州堰泗水於寒山灌彭城以應
侯景冬十月乙酉以尚書左僕射慕容紹宗爲

東南道行臺與驃騎大將軍儀同三司大都督
高岳潘相樂討淵明十有一月大破之擒淵明
及其二子瑀道將帥二百餘人俘斬五萬級凍
乏赴水死者不可勝數十有二月乙亥蕭淵明
至闕帝御閭闔門讓而宥之岳等回師討侯景
是歲高麗勿吉國並遣使朝貢

六年春正月己亥大都督高岳等於渦陽大破
侯景俘斬五萬餘人其餘溺死於渦水水爲之
不流景走淮南己未齊文襄王來朝請以寒山

獲士賜百官及督將等各有差二月己卯蕭衍遣使欸闕乞和并修書弔齊文襄王文襄王還晉陽三月癸巳以太尉襄城王旭爲大司馬以開府儀同三司高岳爲太尉辛亥以冬春亢旱赦罪人各有差夏四月甲子吏部令史張永和青州人崔閼等僞假人官事覺糾檢首者六萬餘人秋八月甲戌以尚書左僕射慕容紹宗爲大行臺與太尉高岳司徒韓軌大都督劉豐等討王思政於潁川引洧水灌其城九月乙酉

蕭衍遣使朝貢冬十月戊申侯景簿江推蕭衍弟子臨賀王正德爲主以攻建業是歲高麗室韋蠕蠕吐谷渾國並遣使朝貢

七年春正月戊辰蕭衍弟子北徐州刺史中山侯蕭正表以鍾離內屬封蘭陵郡開國公吳郡王三月丁卯侯景尅建業還以蕭衍爲主衍弟子北兖州刺史定襄侯蕭祗相譚侯蕭退來降衍江北郡國皆內屬夏四月大行臺慕容紹宗大都督劉豐遇暴風溺水死甲辰詔以齊文襄

王爲相國齊王綠綬綬贊拜不名入朝不趨劔履上殿食冀州之牧海長樂安德武邑瀛州之河閒五郡邑十五萬戶餘如故王固讓是月侯景殺蕭衍立子綱爲主五月齊文襄王帥衆自鄴赴潁川六月丙申克潁州擒寶炬大將軍尚書左僕射東道大行臺太原郡開國公王思政潁州刺史皇甫僧顯等及戰士二萬餘人男女數萬口齊文襄王遂如洛州秋七月齊文襄王至自南討請宥思政之罪八月辛卯詔立皇子

長仁爲皇太子齊文襄王薨於第祕不發喪癸
巳大赦天下內外百官並加二級甲午齊王如
晉陽冬十月癸未以開府儀同三司咸陽王坦
爲太傅甲午以開府儀同三司潘相樂爲司空
十有二月甲辰吳郡王蕭正表薨己酉以并州
刺史彭樂爲司徒是歲蠕蠕地豆于室韋高麗
吐谷渾國並遣使朝貢

八年春正月辛酉帝爲齊文襄王舉哀於東堂
丁卯詔贈齊文襄王假黃鉞使持節相國都督

中外諸軍事齊王璽綬輜輶車黃屋左纛懸前後
部羽葆鼓吹輕車介士備九錫之禮諡曰文襄
王戊辰詔齊王爲使持節丞相都督中外諸軍
事錄尚書事大行臺齊郡王食邑二萬戶甲戌
地豆于契丹國並遣使朝貢二月甲申葬齊文
襄王車駕祖於漳濱庚寅以尚書令高隆之爲
太保三月庚申進齊郡王爵爲齊王夏四月乙
巳蠕蠕遣使朝貢五月甲寅詔齊王爲相國摠
百揆封冀州之敕海長樂安德武邑瀛州之河

閒高陽章武定州之中山常山博陵十郡二十
萬戶備九錫之禮以齊國太妃爲王太后王妃
爲王后丙辰詔歸帝位於齊國即日遜於別宮
齊天保元年五月己未封帝爲中山王邑一萬
戶上書不稱臣荅不稱詔載天子旌旗行魏正
朔乘五時副車封王諸子爲縣公邑各一千戶
奉絹三萬匹錢一千万粟二万石奴婢三百人
水碾一具田百頃園一所於中山國立魏宗廟
二年十二月己酉中山王殂時年二十八三年

二月奉諡曰孝靜皇帝葬于漳西山崗其後發之陵崩死者六十人帝好文學美容儀力能挾石師子以踰牆射無不中嘉辰宴會多命羣臣賦詩從容沉雅有孝文風齊文襄王嗣事甚忌焉以大將軍中兵參軍崔季舒爲中書黃門侍郎令監察動靜小大皆令季舒知文襄與季舒書曰癡人復何似癡勢小差末帝嘗與獵於鄴東馳逐如飛監衛都督烏那羅受工伐從後呼帝曰天子莫走馬大將軍怒文襄嘗侍飲大舉

觴曰臣諱勸陛下酒帝不悅曰自古無不亡之
國朕亦何用此活文襄怒曰朕朕狗脚朕文襄
使季舒歐帝三拳奮衣而出明日文襄使季舒
勞帝帝亦謝焉賜綃季舒未敢受以啓文襄文
襄使取一段帝束百匹以與之曰亦一段耳帝
不堪憂辱詠謝靈運詩曰韓子房奮秦帝魯
連恥本自江海人忠義動君子常侍侍講荀濟
知帝意乃與華山王利器元瑾密謀於宮內爲
山而作地道向北城至千秋門門者覺地下響

動以告文襄文襄勒兵入宮曰陛下何意反邪
臣父子功存社稷何負陛下邪將殺諸妃嬪帝
正色曰王自欲反何關於我我尚不惜身何況
妃嬪文襄下牀叩頭大啼謝罪於是酣飲夜久
乃出居三日幽帝於含章堂大器瑾等皆見烹
於市及將禪位於文宣襄城王旭及司徒潘相
樂侍中張亮黃門郎趙彥琛等求入奏事帝在
昭陽殿見之旭曰五行遞運有始有終齊王聖
德欽明萬姓歸仰臣等昧死聞奏願陛下則堯

禪舜帝便斂容荅曰此事推挹已久謹當遜避
又云若爾須作詔書侍郎崔劼裴讓之奏云詔
已作訖即付楊愔進於帝凡十條書訖帝曰將
安朕何所復若爲而去楊愔對曰在北城別有
館宇還備法駕依常仗衛而去帝乃下御座步
就東廊口詠范蔚宗後漢書贊云獻生不辰身
播國屯終我四百永作虞賓所司奏請發帝曰
古人念遺簪弊履欲與六宮別可乎高隆之曰
今天下猶陛下之天下況在後宮乃與夫人妃

嬪已下訣莫不欷歔掩涕嬪趙國李氏誦陳思
王詩云王其愛玉體俱享黃髮期皇后已下皆
哭直長趙德以故犢車一乘候於東上閤帝上
車德超上車持帝帝肘之曰朕畏天順人授位
相國何物奴敢逼人趙德尚不下及出雲龍門
王公百寮衣冠拜辭帝曰今日不減常道鄉公
漢獻帝衆皆悲愴高隆之泣灑遂入北城下司
馬子如南宅及文宣行幸常以帝自隨帝后封
太原公主常爲帝嘗食以護視焉



孝靜紀第十二

魏書十二

魏收書孝靜紀亡後人補以北史又取高氏
小史脩文殿御覽附益之